

En regurdientscha da Gion Antoni Hitz-Berther, Rueras

Norbert Vinzens

Ils 24 d'october ei in numerus pievel radunaus en baselgia da s. Vigeli a Sedrun per prender cumiau dil carezau mariu, bien bab e tat sco era preziau convischine e concartent, che Dieus, il Signur sur veta e mort, ha clamau ord questa veta terrestre a casa en siu reginavel. Suenter ina veta emplenida da lavur, oraziun e quitau per ils ses, eis el spartius da nus il mardis, ils 21 d'october muort fleivlezia dils onns, bein preparaus pil viadi terrester en la biala vegliadetgna da prest 86 onns.

Il Toni Hitz ei naschius ils 11 da november 1911 a Rueras sco fegl digl enconuschent cava-cristallas Gion Antoni Hitz e Maria Barla nata Pally. Il trapassau ha frequentau las scolas dil vitg ni dalla val, ei staus treis stads fumegl el cantun Uri ed il bia dil temps liber ha el passentau cun ir per cristallas cun siu bab ni era cun gidar a lavar talas. Suenter la scola da recrut ha el surpriu cun sia sora Barla e pli tard cun la sora Lucia il consum dil Coop e quei tochen viaden els onns curonta.

Ils 25 da schaner 1945, pia cuort suenter la secunda uiara mundiala, nua ch'il defunct ha surviu varga 1'000 dis,

ha il defunct menau la giuvna Maria Berther da Dieni agl altar da nozzas. Dieus benedescha la ventireivla lètg cun 8 affons, 5 buobs e 3 buobas, per ils quals il Toni ei staus in bien bab e per ils quals el ha giu bien quitaу.

Dapi la maridaglia luvrava il Toni, cu ei fageva basegns, tier l'Ovra Electrica da Tujetsch e pli tard sco luvrer stabel. Dasperas vegneva ei aunc fatg in tec il pur cun tiers manedels ed ina vacca. Igl onn 1972 ha il defunct giu in accident e calau tier la OET e danovamein surpriu la stizun dil Coop a Rueras. Igl onn 1978 ha el terminau la lavur tiel Coop.

Sper sia lavur ha il defunct Toni Hitz mess a disposiziun sias forzas e habilitads al generaless. Ils onns 1953-59 eis el staus gerau e vicepresident dalla vischnaunca da Tujetsch sco era actuar dalla cumissiun pauperila. Plinavon eis el staus - suenter la nova constituziun da vischnaunca - commember dil Cussegl da vischnaunca ed actuar e lu era commember dalla cumissiun d'arrundaziun. El Cumin dalla Cadi ei il Toni staus 2 onns suppleant dil Cussegl grond e 4 onns suppleant da

mediatur da Sursassiala.

Igl onn 1933 ei il defunct Toni entraus el Chor da baselgia da Rueras. Per tut siu engaschi e plascher dil cant ha el retschiert igl onn 1983 la medaglia papala «*Beni merenti*». Il temps ch'il Chor da Vallada ha existiu, ha il giubilar era priu part tier quel sco assist.

Igl onn 1943 eis el daventaus commember e fundatur dall'uniun da

catschadurs «*Badus*» ed era igl em-prem cassier da tal'uniun. La catscha ei stada siu preferiu hobi ch'il trapassau ha teniu zun ault tochen viaden en zun aulta vegliadetgna. Avon in onn ein ils consorts serendi en casa s. Vigeli per passentar leu la beinmeritada sera dalla veta. Il defunct ha astgau mirar anavos sin ina veta cumplenida, far bilanza e scriver en sias remenisenzas: «Cun agid da Diu hai jeu saviu viver ina biala veta.»

El ruaussi en pasch!